

危太樸集

危太樸文續集卷四

墓碣銘

故貴谿彭君墓碣銘

有序

朝列大夫高州路同知總管府事上饒徐侯容述其同
郡彭君九萬之行曰君諱鉉九萬其字也姓彭氏其先
繇金陵徙居鄱陽宋治平二年進士第一人諱汝礪仕
至寶謨閣待制樞密都承旨其後有諱煥者再徙信之
貴谿王侯石迨君十世矣曾大父英大父應桂巴陵縣
儒學教諭父宗溥高州路蒙古字教授母馮氏君生於
延祐元年九月幼則秀異穎敏書再讀輒能記進士弋
陽方君回孫來爲邑丞君從之受春秋切礪攷訂朝夕

不倦方君亟稱之至順三年秋試於有司不中君未嘗有所怨懟曰我所學未至也於是退而益修其業手書春秋決微廿冊後三年復往試卽貢院以疾歸曰吾之不利於此豈非命歟迺閉戶讀書自勵彌篤然不復以資進取務求聖賢立身之大者父母或微疾服勤湯藥晝夜忘寢食者累旬卒無惰容平居作止雍容恂恂雅飭族婣師友恭敬唯諾閨門允慎禮法內外無閒言至正四年二月□□得疾至□□夜起與兄弟訣曰吾不復起矣吾兄弟其善事父母言終奄然而逝年甫三十娶同邑李氏生一女無子教授君命其兄錫之子愷爲之後是年四月□□葬永和鄉之永安里其弟鉉來京

師致其父命請余銘昔鄧文肅公銘巴陵公墓謂天之報施善人將在其後裔君積學而不年信乎天者不可信神者誠難明矣銘曰

王侯之石生雨雲居者本諸武夷君芝蘭玉樹揚清芬奄然遺世藏書存裴回空山涕泗紛尉其冥冥在斯文

舒君師文墓碣銘

宋景定三年我曾大父仁和府君與太學博士四明舒公津同登進士第後七十有九年公之族孫莊相見京師雅善余它日以親命請銘其大父教諭君之墓莊之言曰吾先世之書子嘗讀之吾之譜系子嘗考之先大父之事吾父有識墓之文莊不敢有所加也按舒氏自

唐祕書郎守謙始居越其孫承福徙奉化承福元孫卞
宋承節郎贈宣義郎出岳武穆王幕中卞生黻通直郎
贈承議郎陸文達公稱其讓恭足以警傲惰之習粹和
足以消鄙倍之氣生子七人其第六子璘與朱文公及
陸氏昆弟遊通判宜州謚文靖楊文元公稱其孝友忠
實道心融明璘生鉦鉦生修職郎泌泌生教諭君諱棫
字師文生宋嘉熙三年六月性溫厚持身端謹幼稟學
家庭劬書耆古結交老成旣長博通經術尤長於書累
試有司不中程而講習益富業成而宋之選舉終矣家
有廣平書塾延名師訓其子弟期弗墮先緒君蚤喪父
事其母以孝聞綜理家政有法處昆弟無閒言春秋祭

祀執禮恭恪子女冠笄必遵儀式族人有貧而棄其先墓者輒出私財復之更立規約刻石示後元貞初部使者秋公桂按部至郡秩祀先賢儒學且錄其後以君文靖曾孫薦爲象山儒學教諭宋禮部尙書王公應麟爲詩送之旣至橫經正席發明先儒要旨聽者悅服秩滿杜門閒居不復求仕進延祐六年知州馬侯稱德修學政起君爲之師甫半載以耄辭明年九月九日薦先廟畢盡發所藏書整輯標志越三日□□得微疾猶讀書不輟少焉而逝神色湛然享年八十有二娶連氏繼蔣桂氏子男五人勲黠然熊庶勲蚤卒黠爲從弟櫟後然使其子求余銘者也女三人長適里中戴景良次適仇

鑰季適朱洪孫男六人在升莊墾臺埒女一人適汪清
會孫男四人興賓復初詠沂□□女二人長適曹某君
所著有尙書說約四書說略總若干卷其墓在剡源鄉
松谿里之原葬以卒之年十二月庚申銘曰

軒冕金玉矜市兒天爵之貴君所縻藏書名山世莫知
光輝夜騰滄海湄盤盤岡阜幽宅宜千載而下考銘詩

宋鄉貢進士周先生墓碣銘

先生諱從周字文郁姓周氏其先諱瑤者唐末繇今撫
州寶應僧寺前徙南城縣小港莊藕塘里至先生曾大
父布家始盛大父昭父明夫母何氏夏氏先生何出也
生於宋寶慶三年十一月蚤嬰家事未遑學問年十有

七乃刻志師鄉先生張某宗人著作郎方工部尙書湯
文清公爲貴谿象山書院山長先生從之遊湯公手批
古文數百篇以授卒以詞賦擅名淳祐六年舉於鄉建
昌守翁公合方務作新文體獨喜得先生爲益友尋提
點江西刑獄招先生偕行提刑司私試命幙賓分較湯
公皆不可因諉先生弟其高下得數篇於廢卷中置首
選翁公大喜參知政事曾公淵子在朝館留者八年尤
相知先生好左正明司馬遷韓愈蘇軾氏之書爲文典
雅溫潤紆餘盡態不爲鉤章棘句而神奇臭腐精采自
見蚤學詩於知南昌縣曾公原一大宗正丞趙公崇嶠
而得其精微先生氣稟剛正德量寬宏無宿怨無蓄怒

嘗有德於人尋亦忘之負己者不以爲憾陵己者不以爲忤久而其人媿恨無所容爲人謀必盡忠無餘蘊鄉鄰有爭論之以理無不聽服明於事幾多慮而下人好謀而從善性不喜浮靡結廬取庇風雨凝塵滿席一不以挂意先生之學不耑於記問訓詁而大綱大目一見超詣證之身心見諸日用無往而不合不爲詭異卓絕之行曰道貴可繼中庸□□爾也故厚倫急誼要皆以誠實爲本初與伯氏汝元仲氏汜有盛名咸淳二年伯氏亦舉於鄉仲氏舉於轉運司當時尤以不第爲先生惜宋亡歸隱山中翰林侍讀學士程公蜚卿及其弟學士承旨鉅夫皆有意薦引先生以老辭儒學提舉黃公

謙亨首署爲盱江書院山長不就所居與潯安令曾公
子良甚邇倡酬問答無虛月客至必論前代典故諸老
風流令子孫識之曰恐後不能復知矣大德二年正月
□□以疾卒於家至是得年七十有二明年十一月甲
申葬於里之黃甘子男四人士麒士麟士岳士鸞士鸞
先八年卒女一人適鄉貢進士黃炎薦孫男六人□壽
同壽亦壽久壽永壽文壽曾孫男十五人延桂延□延
年延世延齡延忠延平延善延緝延充延□延□延□
延□延□□孫男十六人先生旣沒五十有四年延充
以士麒所述屬史官危素爲文勒諸墓碑素方成童以
先太常府君之命出見鄉先生始出而謁士麒士岳拜

先生遺像於四谿書院藹然詩書之家惟先生父子兄弟積厚而不及發天之所遺將在其後人耶銘曰

積學於躬命之弗逢沔彼谿水其流靡窮黃甘之里歛茲幽宮銘以闡之永懷高風

故承事郎汴梁路通許縣尹王公墓碣銘

公諱鼎字和卿姓王氏其先自唐時居汭曾大父顯金正大八年北度至蔚州家焉大父大有父行簡以祕書監薦入司天臺母羅氏段氏公段出也生於壬寅歲九月家占軍籍公以褻衣戎冠出入隊伍主將異視之使之賦詩操筆輒就請於朝得歸農於是益修其業清勤謹飭而善譽日章有司舉以充歲貢給事中辟爲令史

操守端慤考滿調高唐尉莅事有治效再調樂壽遷將
仕郎深澤主簿曹州知事以親年高棄官歸養訓諸子
以學隱居廿餘年當道選爲汭梁路通許縣尹兼管諸
軍輿魯勸農事公遂告老矣延祐七年九月□□朔卒
得年七十有八娶于氏張氏子男四人宏道司辰郎司
天監教授宏偉采石批據所大使宏鈞欽象大夫提點
司天監事宏達汝寧府平準行用庫副使孫男三人瑞
司辰郎司天監管句璿蚤卒理天文生女五人元統元
年十月癸酉葬於大都宛平縣西午邨之西原葬後廿
有一年宏鈞屬素爲文刻諸墓碣公素樹志節尙友古
人所居澹然簡靜不樂紛麗燕閒獨處事無忘動凡世

之所爭趨者公則恬然自安平居多引先哲格言開諭
學者里巷之是非有弗能自直者輒求辨於公折以片
言莫不畏服以是稱爲長者素始至京師卽識提點聞
其守官謹飭而奏對切直又以知公之善教也銘曰
王氏之先世居大梁歷宋與金轉徙靡常維公祖考卜
宅代郡□□□遠緒猶振公以才選州縣孔勞人進
我止藏其善刀□□□出宰通□仁政宜明冰清檠
苦公有賢子如古義和侃侃正直立朝不阿克肖其賢
繫公之教申情述哀老而彌孝鬱鬱松柏西午之原載
德不朽刻詞墓門

故臨川處士饒君大可甫墓碣銘

余少則閒造郡城必見鄉先生吳仲谷氏登清潤堂因
識其壻饒君久之君視余尤厚至元再紀元之二年與
君別後八年君卒又八年君之門人李衡王晉以薦春
官請銘其墓迺求其家世學行之詳於君之從弟某州
儒學教授熙則狀君之行者信豐縣尹婁君志澤也君
諱泰來字大可世居撫之臨川曾大父景年大父鏗無
子以族人神童釜之子人龍爲之後實生君未冠而孤
時內附未久先業蕩盡而獨存所藏書數千卷君日優
游其閒然於詩春秋尤致意焉鄉之先達若程文憲公
徐公奇伯趙公孟蜚孫公轍咸禮重之蜀郡虞公汲校
君所爲經義書其後曰比事引證深得聖人書法謂所

擬制誥它日當潤色皇猷吳文正公亦稱其淹貫四書深得經旨龔公孟夔跋其文藁曰根著理道鑿鑿精實是數公者樂引重後進而慎許可觀其言足以知君之學矣太史金華柳公貫提舉江西儒學部使者河閒張公榮爭欲致君於學校爲諸生矜式皆辭不就至順間吳公仲子京爲郡教授以禮延聘乃行會吳公就養知其學延致家塾君日親炙而所造益深延祐初科目法行君卽以春秋授一再試有司不偶乃歎曰命也遂退隱不求聞達至是州里之學者日歸之君生至元十六年四月卒之時至正三年七月丙子也享年六十有五其文若干卷藏於家子男二人士立士益女二人長適

李衡次適鄭某孫女一人是年八月己未葬所居積善鄉葉方之原嗚呼吾鄉文獻之傳號爲尤盛近歲老成淪落殆盡而君之沒且一紀矣可勝悼哉銘曰
士有不遇視其可傳有歸文冢饒君之阡維德之樹維學之顓紀述終古視諸銘鐫

顏一初墓碣銘

元統元年春余友顏君一初得病嘔血遠近師友皆來視之且徧求良醫其弟善慶兩割股肉和藥以進旣瘡而復作者二年矣乃至元元年六月廿八日卒於家將葬其友饒旭子初來屬余銘君之墓余謝曰安仁李仲公先生君嘗踵門問學其文足以使君不朽非余之

不佞所敢當也其後子初兩至京師速余文則應之如初不幸先生去世而子初亦溺死黃河而君之沒亦廿年終不可無述使泯泯也則爲敘而銘之按君諱善膺姓顏氏一初其字也其先居隆興之進賢隆興今爲龍興宋大觀三年有諱元者徙居撫之臨川長壽鄉之先塋高祖有文遷悅塘家業再裕生子三人長諱敏則君之曾祖也寶祐閒嘗聘漳安令金谿曾氏子良授業焉曾氏亦稱其一門子弟忠厚俊秀自是以儒學名其家祖泰孫復徙桃華峰下之禮方父翔鳳母口氏君生元大德九年三月幼而天資敦敏狷介而通大父延名師以教之稍長應門頗已廢學一旦忽爾自奮曰古今賢